



Sennacherib ayant assiégé Ierusalem est déconfit par l'Ange du Seigneur, qui occit cent octante-cinq mille hommes.

ZECHIAS fils d'Achas fut bon Roy, faisant tel deuoir que le Dieu viuant fut reconnu pour Souuerain, dont pour cét effet fit abbattre & dissiper les bois où on adoroit les Idoles, & les mit en pieces, comme il fit aussi abbattre le Serpent d'airain qu'auoit fait éleuer Moyse. Durant ce temps, Sennacherib Roy des Assyriens grand contempteur de Dieu, enuoya par orgueil deffier par ses Herauts Ezechias, & cryoient, disans au peuple, Escoutez: Le Roy des Assyriens dit ainsi, Ne vous fiez en Ezechias, car il ne vous pourra garantir de ma main, & ne vous amusez à ses propos, disant que Dieu vous en deliurera, & que Ierusalem ne sera point prise par les Assyriens. Toutesfois en cette affliction le Prophete Esaye conforta le Roy, en l'assurant par la parole du Seigneur d'une victoire contre ce puissant ennemy, lequel avec une puissante armée assiegea Ierusalem. Adonc Ezechias fit oraison à Dieu, lequel enuoya son Ange qui tua de nuit cent octante & cinq mille des Assyriens, qui fut occasion que Sennacherib s'enfuit confus en sa ville de Ninie, où il mit à mort plusieurs Iuifs que Tobie enseuelissoit. C'est pourquoy ce bon homme fut banny, & ses biens confisquez, mais Dieu permit que quarante iours apres Sennacherib fut occis par ses propres enfans, ainsi qu'il adoroit ses Idoles.